

## Jahresbericht der Präsidentin 2024

Im 2024 hei die meiste Gruppe vom SGV Büren am Mittwoch 10. Januar wieder mit de Trainings agfange.

Die 9. GV vom SGV Büre a der Aare het am 8. März im Restaurant Krone chönne stattfinde, es isch alles planmässig abgloffe u nach chlei meh als ere Stung heimer üs am gmüetelech Teil chönne widme.

A der 1. Vorstandssitzig im 2024 heimer einigi Theme gha, unger anderem dass mer die Matte für üses VGT u VGTJugend Bode hei müesse aschaffe, damit mer überhoubt richtig cha trainiere. Mit de Personalwechsel simer ono chlei beschäftigt gsi, so het Lena ke Zuegang me gha zum E-Banking, wiu sie ja z'Sekretariat het überno, aber dummerwies het d'Anna ersch einiges später dr Zuegang brcho da me das ja alles mit GV Protokoll u ungerschripte muess belege.....

A de witere Vorstandssitzige heimer wie immer verschiedeneni Gschäft behandelt, über Aläss u Trainings viu diskutiert.

Im Juni isch de ds Turnfest u dr Jugendturntag in Kallnach ufem Programm gstande. Am erste Wuchendi isch d'Jugend dran gsi u es het nur einisch gränet...am 2.Wuchend de die Aktive. Kallnach het ächt Pech gha mitem Wetter, sie hei aber z'beste drus gmacht u es super Turnfest uf Bei gstellt, wigers dadrüber findet dir i de Brichte vo dr VGT Guppe und em GETU. Bsunders Stolz bini ufs VGT, hei sie doch im 24i z'erschte Mal am 3teilige Wettkampf chönne starte!

Am 26. Juni hei mir üs zum traditionelle Brätle ufem Helvetiaplatz troffe. Ds Wetter het nid würtlech mitgschpiut wi so oft i dem Juni, mir hei dr Sunneschirm als Regeschirm gnützt, süsch wär üs z'Füür usgange. Trotz em Wetter hei ganz vieli vo üsne Mitglieder dr Weg ufe Helvetiaplatz gfunge.

Vorstandssitzig im August heimer la suuse, da mer nüt dringends gha hei, derfür si Lüku u i a di usserordentlechi DV vom TBS uf Biel. Vorher heimer no dörfe ä Blick i die neue Multisporthalle werfe, u gseh was dert grossartigs entsteit!

Im Oktober heimer immer ä Vorstandssitzig und ä Leiter:innesitzig, wo mir vo üsne tolle Leitende vo de verschiedene Gruppe über di neuste Enwicklige i de Gruppe ufdatiert werde. Es freut mi z'gseh wie Engagiert üsi langjährige Leitende die Gruppene führe. O das mir immer wieder zuewachs hei zügt vo ganz vielne tolle Trainings wo sie im Name vom SGV Büre dürefühere!

D' Abendunterhaltung 2024 isch ungerem Thema „Movie Night“ ufem Programm gstande. Mir hei sehr vieli Bsuecher dörfe i dr Sporthalle begrüsse, die verschiedene Programme si sehr guet bim Publikum acho! U o finanziell gseht d'Abeunterhaltung 24 recht guet us 😊

A derä Stelle dank i üsne Leitende und Programmverantwortliche herzlich für die schöne Programm. I erwähne gern d'Nicole Fuhriamnn u d'Alexandra Délétroz, d'Sybille Fuhrimann u ihres Team, d'Lara Basler, d'Leona Frantzen, d'Staschia Meier, d'Anna Lauper, d'Fabienne Affolter, dr Lukas Kummer u ds Chrigi Basler. Es isch würtlech nid selbstverständlich, dass jedes Jahr so viu Zyt u Herzbluet i di Programm u id d'Deko vo dem wichtig Aläss für Büre investiert wird. Merci viu mau!

I ha leider gar nid viu vor Abeungerhaltig mitbercho, wiu i ar SM in Thun am werte bi gsi, was i ja aber o gern mache.

Allne üse Vereinsmitglieder dank i für Ihres Vertraue wo si üs als Vorstand entgä-gebringe. Zämäarbeit mit mine Vorstandsmitglieder macht mer zum Glück o meh freut als Jahres-Bricht scribe. I danke Euch für Eues Engagement füre SGV Büre, wiu nur mit Euch allne chöi mir all die Ching, Jugendleche u Erwachsene witerhin mit freud Bewege. Mir freue üs über jede Zuewachs i de Turngruppe u interessiere üs für euchi Alige! We dr also öppis ufem Herz heit chömet uf üs zue!

Fürs neuä Vereinsjahr wünsch i allne us üsem Verein u ihrne Famile u Fründe viu lustigi, sportlechi Erlbnis u grundsätlichi Zfriedeheit

Rüti, im Februar 2025 eui Präsidentin Sarah Dasen